

四庫全書

集部

欽定四庫全書

集部
翠屏集卷二

詳校官鴻臚寺少卿臣梁燾陽

中書臣劉源溥覆勘

總校官庶吉士臣何思鈞

校對官中書臣潘庭筠

謄錄監生臣史堂

欽定四庫全書

翠屏集卷二

明 張以寧 撰

五言律詩

題江仲暹聽鶴亭

仙鶴在人世長鳴思遠空
有人秋水倚杖月明中
玉樹三更露銀河萬里風
徘徊意無極遲爾出樊籠

送同年江學庭弟學文歸建昌

白髮江夫子青雲信獨稀
故人長北望令弟又南歸
庭

樹鳥先喜江帆鴈共飛東湖春柳色到日上君衣

送王伯純遊錢塘

君去渡江春鶯花著處新湖山有喜氣天壤見斯人
殘雪明松嶺閑雲傍葛巾平生塵外意於此得天真

送侯邦彥自南譙遊建業

君向金陵去雲帆百尺懸杯搖江色裏詩墮菊花前
涂水明秋月鍾山起暮烟鳳臺逢李白一為問青天

題廣陵姚節婦卷

黃鵠不重適哀鳴常自憐披心當白日留面覩黃泉寂
寂誰能爾滔滔汝獨賢廣陵姚氏傳史館幾時編

題劉君濟青山白雲圖

野性夙所忻青山無垢氛落花一夜雨幽樹滿川雲鹿
跡閑行見松香獨坐聞殷勤招白鶴予亦離人羣

九江廟

遺臺上古城劒氣夜崢嶸天地英雄恨春秋父老情蜀
崗來楚盡涂水近江平往事何勞問長陵草自生

春日懷李叔成上舍

今代李公子詩看老杜親
江湖留鴈久風雨惱花頻
竹屋燈懸夕椰瓢酒漾春
殷勤海子水待汝濯紅塵

夜飲蔣師文齋館

故人相與醉虛幌坐來清
月色宛在地鐘聲忽滿城
都將十載意併作異鄉情
若買青山得相攜歲晚行

題余寄庵卷

全真

窻過梅花月簾浮栢子烟
人生如寄爾吾意正翛然
江

海虛舟外乾坤短
褐前蓬萊清淺日
知是子歸年

雨中

歷歷愁心亂
迢迢客夢長
春帆江上雨
曉鏡髮邊霜
啼鳥雲山靜
落花溪水香
家人亦念我
與爾黯相望

崇德道中

煖日菜花稠
晴風麥穗抽
客心雙去翼
詩夢一扁舟
廢塔巢蒼鶴
長波漾白鷗
吳山明月到
惻愴十年遊

浙江

山從天目下潮到富陽迴此地扁舟去吾生幾度來林
紅晚日落江白雨雲開明且須停棹呼兒看釣臺

過龍游

鷓首見龍游羣山翠浪流陽坡眠白犢陰洞鎖蒼虬樹
密雲藏屋灘長石啣舟呼兒具尊酒聽客說杭州

宿籌嶺

昔者屯兵盛甌閩此地分清時無寇盜比屋樂耕耘澗
響不知雨山高都是雲明朝見親舍一笑慰辛勤

贈別同年何詹成

十載鬢俱白故人心尚丹
中年知舊少遠道別離難
我欲扁舟去君留寶劍看
酒酣望滄海碣石在波瀾

送徐君美之六合縣尹

山縣棠梨樹題詩動憶君
尊前俱白髮馬首又青雲
春郭千花合秋庭一鶴聞
公餘好心事令子已能文

長蘆寺

達磨來東土茲峯天下聞
樓明涂水月鐘度蔣山雲
梵

咀江龍出僧齋野鷓分一帆風力便吾欲謁神君

建業清涼寺次王伯循御史竹亭壁間韻

獨尋清涼寺還望翠微亭客散竹間月僧閑松下經江
聲迴近浦野色到虛庭白髮山中叟為子詩眼青

題吳恭清茂軒

幽尚謝塵牽吳生獨爾賢風泉歌枕外春樹讀書邊
隱懷盤谷新圖出輞川詩僧來往數好句賸能傳

題曹子益可竹亭

竹西清絕處三逕萬琅玕畫枕翠濤響春衣青雨寒登
君好亭子回首憶江干嗜酒那無此吾今欲掛冠

泊戚家堰遇風夜雷雨

高浪出魚龍舟師急捲蓬雷聲過雲雨月暈斷河風野
濶人家外濤喧客枕中坐來搔短髮惆悵大江東

題青山白雲圖

白雲江上頭憶着昔曾遊睡起青山雨坐來紅葉秋深
苔依逕濕寒磬出林幽亦有高棲者無因見鹿裘

途中次子烜韻

日出河隄平春來柳眼醒
薊姬天下白遼隼海東青
浪起層層雪沙明點點星
片帆風力健予欲運南溟

微官與志違空負聖明時
對酒懷彭澤題詩愧漢陂
遙天和樹盡斷岸逐舟移
楊柳黃金色隨春入硯池

舒嘯軒

幽居蒼竹林永嘯白雲岑
自吐虹蜺氣人聞鸞鳳音
野煙喬木晚江雨落花深
亦有東臯興何當一抱琴

至直沽

野樂天低水人家時雨三鴈聲連漠北魚味勝江南雪
攤蘆芽短寒禁柳眼絨持竿吾欲往拙宦白何堪

夜久

夜久未能寐春來空復情遠沙爭月色柔櫓助河聲客
枕荒鷄到漁歌宿鳥驚隣舟燈火亂早起又詩成

舟中見雨

今夜初聽雨江南杜若青功名何鹵莽兄弟摠彫零遠

夢愁胡蝶深情愧脊令撫孤終有意身世尚流萍

江干

江干望不極樓閣影繽紛水氣多為雨人烟遠是雲子
生何濩落客路轉辛勤楊柳牽愁思和春上翠裙

淮安寄同年伯牙原卿

不見原卿久題詩白髮催人文望公等天意老英才柳
色長淮早潮聲蒲浦回菊花寒鴈過憶共故人盃

送僧南歸

兵塵猶瀕洞僧舍亦徵求師向江南去予方輟下留風
霜兩足白宇宙一身浮歸及梅花發題詩寄隴頭

次李參政省中獨坐韻

時在翰苑

畫省畫岑寂坐來風葉鳴雨晴鴝鵒觀秋滿鳳凰城許
國丹心在懷鄉白髮生所慚無寸補載筆直承明

次韻

全上

白髮懷閩嶠丹心戀薊門官閑勝道院宅遠類荒村二
月霜華薄羣山雨氣昏東菑春事及好共野人論

題山水圖

山水坐來見，倏然無俗氛。
碧巖虛夜月，江樹靜秋雲。
鳥影似猶見，猿聲疑或聞。
自憐歸未許，遙憶武夷君。

用烜韻呈王趙二明府

二妙驚聯壁，雙飛垂近天。
不懸高士榻，許上孝廉船。
談劇常絕倒，情真任醉眠。
殷勤御河月，相送大江前。

憶黃子約

天台黃石老茅屋，冷如冰消息。
經年斷交游，往日曾世。

人憐李白今我愧孫登
駿骨篇應在何時復剪燈

董子廟

董子天人策寥寥四百年
臨風一懷古此地昔生賢
白日明肝膽青山悶簡編
公孫東閣客今復幾人傳

二月十五日舟中見柳始青

宛宛縈隄水淙淙逆浪舩
清晨風已轉今夜月初圓
歸客春多夢舟人早懶牽
無端楊柳色青入柁樓前

荆門閘

卷二
車到荆門上舟移鉅野中河聲來汶濟山色見龜蒙揚
柳烟深淺杏花春白紅人家桑棗外猶是古人風

宿遷縣

今朝宿遷縣風急掉難停樹合藏深屋河移出遠汀山
容雲冉冉水影日冥冥柳色無南北春來不斷青

宿泛水

寶應南邊宿逆風舟子勞空村防鼠竊不寐聽鷄號月
黑平湖白天低遠樹高家山來枕上夜起首頻搔

別王子懋趙德明

御河船上月相送到揚州共飲忽為別獨吟方覺愁水
花苔渚晚雲樹浙江稠歸鴈長淮早裁詩寄與不

過常州

昔日延陵地城基麥秀間兵戈三戶少生齒百年還盡
壁曾同看求田惜未閑故人盧可及宿草在何山

近無錫道中

疊橋隨港直聯木護堤偏村落皆通水人家半繫船橋

花香曙露揚葉淡寒烟中土何寥廓黃沙人種田

別忻都舜俞用烜韻

回回氏能詩

日出嘉興郭楊花蕩白波船頭將酒別客裏奈春何西
極驂騑遠南湖鴻鴈多清朝詩道盛期子被絃歌

過桐廬

絕愛桐廬水潮回綠蒲溪海風吹雨去山日傍雲低涉
世心猶壯思家夢欲迷獨慚老萊子白髮尚兒啼

夜泊東關

泊舟新安口月出溪南峯紅燈照窳堵綠水開夫容李
白題詩處何人繼其蹤我欲擷長笛幽壑舞魚龍

舟中

嘆息舟人婦哀音此日來死生誰料得貧賤益堪哀去
棹從渠駐歸心未忍催春江昨夜雨花落滿蒼苔

過蘭溪

昔過蘭溪上秋風把酒盃重來人事異獨立客心哀沙
合灘聲轉帆移塔影來赤松山色近佇望意徘徊

泊湖頭水長

客路春將晚，征帆日又曛。
深山昨夜雨，流水滿溪雲。
渡黑漁舟集，村空戍鼓聞。
故園頻夢去，植杖已堪耘。

雨發常山

僕夫趣予起，初日出林間。
既雨縱橫水，無雲遠近山。
馬嘶芳草去，燕語落花閑。
且喜邊陲定，長逢戍卒還。

宿烏石

青山烏石名，偶似越王城。
嵐撲單衣重，溪搖倦枕驚。
驚燃

松添酒酌題竹記詩成明發
閩關路青雲趁足生

分水舖道中

長憶閩中路今朝馬首東
山高雲易雨谷響水多風
蝶抱落花片鳥啼深竹叢
功名一畫餅身世獨飛蓬

宿黃亭明日四月一日夏至

弛擔沽紅酒開窻挹翠微
故廬何日到野店送春歸
雉起麥花落蠶登桑葉稀
田園有真趣歲晏莫相違

庚辰
年五

言律
止此

安南即景

此一首洪武二年在安南作

龍水南邊去行穿萬竹林
羊腸山險盡蝸角地蟠深
銅柱千年恨星槎萬里心
朝來晴好景綠樹響春禽

五言長律

送陳子山狀元之太廟署令

紫殿傳臚日君名第一人
星辰金榜動雨露錦袍新
華蓋天常近蓬萊地益親
北門方眷切東觀又恩頻
麟筆三朝史龍顏一笑春
昕庭頌渙號太室奉明禋
列聖羅

冠冕羣公肅縉紳
商雲垂柳重祥靄
纂芝勻獻賦
看來
歲登瀛及此辰
風帆開巨浪
霜翮上秋旻
文價何輝赫
臺端即選掄
故人如見問
白髮尚漳濱

送三人傑都事開詔福建

曩客東泉老相逢
蓋屢傾劇談消鄙吝
高誼動幽明
我素金門隱君歸
錦里耕五年才一見
萬里又重行
故老扶藜拜元戎
負劔迎江環
螺女浦山盡
粵王城麥飯先
塋感尊羹
故國情自憐
何日去曝背
憇柴荆

環一作深非

送杜德夫河東經歷

持斧山西去參謀用俊人
栖烏臺上掾泛綠幕中賓
霜落豺狼魄風清鴈鶩塵
君行當要地此別屬良辰
塞遠雲來代川長樹入秦
兩河猶戍卒三晉半殘民
峻坂疲飛輓窮閭苦算緡
鴻饑方欲集鷹飽正須馴
久矣瘡痍極居然風采新
難兄今閣老宿望舊廷臣
棠樹期連萼葡萄少飲醇
乘驄消息好拜命及三春

次韻鄭蘭玉

有一竿亭

一竿亭上客大隱寄高軒世德榮珂里風期邁漆園朝
廷深簡注江漢壯藩垣儼宅今王祭藏書舊李繁市聲
隔幽薄野趣似遙村宛宛山迎坐迢迢水到門風鳴松
頂鶴雨掛竹枝猿芳薜牽崇雷圓荷點小盆弄泉醒酒
面掃石健詩魂邈矣囂塵表居然太古存長鯨冬已戮
饑鴈夜猶喧栢署須綱紀蘭臺待討論白雲巢未得鵬
路佇飛騫

賀禮部王尚書本中二十韻

孤竹先賢國三槐故相庭恭惟我文肅藉甚古儀型金
掌新卿月銀槎舊客星青箱傳遠大綵筆動精靈右掖
何清切中朝重委令判題花粲粲嘯咏竹泠泠宗伯司
周典尚書管漢庭地華人更妙名盛德惟馨斗運天喉
舌雲飛雪羽翎趨朝羣腰裊開宴萬娉婷舞艷團珠袖
歌長簇錦屏橐荷元映紫簡竹要垂青知貢春題榜焚
香畫鎖廳為公植桃李報國蓄參苓丹扆更新詔蒼生
望永寧芝泥看鳳下薇閣待鸞停傳說升調鼎匡衡奏

引經即應清海岱還復禪云亭自哂依清樾猶慙泛梗
萍卑飛惟短翅終願附青冥

送館主朝憲使之淮西四十韻

宇宙開昌運山川產蓋臣周邦多士貴魯國一儒真江
海襟無際風雷筆有神淵涵珠皎潔山立玉嶙峋剡切
三千牘飛揚四十春粵從遊輦轂早已冠成均泮水開
重席中書擢薦紳贊戎淮甸左參憲粵天垠南紀孤飛
隼中臺一角麟大聲搖列岳爽氣動高旻出使方廉察

為郎已選掄治邦用輕典大禮佐宗禋笋立清班峻荷
香紫橐新瓊林無橫賦肺石絕寃民臺省流榮屢朝廷
注意頻庸田俱利導在野不嘖呻全浙推崇劇雄藩藉
拊循申侯仍作翰召伯復來甸海舶回諸國星輶出八
閩層城狐一掃絕島獸皆馴冰蘖俱吾素珠犀詎爾珍
綉衣才受斧芝檢又頒綸雲近蓬萊殿河澄析木津紫
垣依日月黃道上星辰鼎鉉須賢佐網維借舊人飛霜
迎玉節沛雨逐朱輪包尹祠堂外張公水廟濱楚峯涼

浸露肥浪淨無塵東筆應多暇題詩必絕倫列城俄鎮
靜六轡更咨詢晚節看黃菊清秋倚碧筠公心思綠野
帝命簡彤宸昔者開科選先公贊國鈞文風今有賴盛
德豈無因骨相宵人薄心期令弟親同年俱蹕厲此日
獨沉淪戀主肝猶赤思親鬢似銀十年長自苦孤志若
為伸豈意長淮客叨陪翹館賓銘心感知已報國願終
身

挽友人

令弟書來日淒其憶故人每懷將酒別不得寄詩頻萬
里高門舊湖山別墅新一羶真獨冷萬卷詎全貧豈不
雲霄志其如電露身迢迢長夢寐漠漠尚風塵池館餘
花晚山阡宿草春自憐何日去望遠一沾巾

七言律詩

丁卯會試院中次諸友韻

欲向青雲易白衫區區別却舊燈龕方知取貴憑文字
可信封侯只咲談直擬橫空輕似鷲莫為作繭老如蠶

不知鏖戰三千士他日何人步斗南

踪跡飄蓬西復東共來折桂向蟾宮雲烟滿紙文裁錦
星斗羅霄氣吐虹禮樂興隆千載後人材涵養百年中
主文正擬公翰子共喜無私別衆工

長蘆渡江往金陵

春日三竿上翠屏曉風五兩下蘆汀水兼天去無邊白
山過江來不斷青沙觜潮迴平鴈跡海門雨至帶龍腥
昇平不復後庭曲睡起漁歌爛漫聽

喜丁仲容徵君至

題詩苦憶城南郭喜見歸來鶴姓丁
雙鬢野風吹汝白
一燈江雨向人青
志士長嗟靈壽杖
史官獨失少微星
瓊花照眼春無賴
明日酌君雙玉瓶

送帖僉憲赴山北

大寧城郭枕江雄
前代豪華在眼中
中山外貌貅閑夜月
海東鷹隼待秋風
天圍松嶺雲垂幙
霜下金源水若空
益訪民風上天子
忽忘家世是元功

送完者僉憲赴江東

公家世踐台階上江國新瞻使節來
一雨洗冤行列郡諸星執法近崇臺
山川尚似玄暉賦父老皆憐李白才
宛水敬亭如歷遍喬雲高處是蓬萊

送馬仲達秋試

杯酒秦淮初識子虬髯玉面氣如虹
揚州杜牧詩偏好梁苑相如賦最工
翠濕帆前楊葉雨香飄衣上桂花風
送行已有金臺句雙闕春雲五色中

題劉高觀奕圖

松風冉冉羽衣輕
石上談棋笑語清
樵客豈知人世換
山童遙指海塵生
碧桃落盡又春去
白鶴歸來空月明
一着山中猶未了
人間流落不勝情

題廣陵李使君園

最愛燕山李使君
名園草木有清芬
竹光夕度淮南月
松色秋連海上雲
九日登臨來此地
百年忠厚見斯文
酒闌懷我幽棲處
松樹蒼蒼猿夜聞

題信州戈陽周竹窻嘉竹圖

戈水徵君周竹窻傳家累葉尚敦龐高門即見朱輪十
瑞節先看碧玉雙翠鳳並巢依積雪蒼龍分影媚清江
徐公對此尤能賦予欲東遊共酒缸

九日與王伯純登蜀崗

帝子樓前紫翠分廣陵秋色起氤氳泉涵巴蜀千年月
樹入荆吳萬里雲宋玉登臨仍送客魏牟流落豈忘君
明年五岳子真往子有音書當遠聞

丙寅鄉貢同寧德黃君澤韓君瑕林鶴山登幔
亭峯今十五年矣賦此併懷黃子肅同年

憶共故人攜手地幔亭絕頂賦遊仙鵬飛起處三千里
鶴到歸時十五年澄潭月上金鷄響古洞泉流玉幅懸
為報樵溪黃石老幽期長在白雲篇

次李宗烈韻

倒着烏紗醉幾回白鷗門外莫相猜浮生萬古有萬古
濁酒一杯復一杯棕葉響交風色異豆花飛滿雨聲來

青燈獨似兒時好一卷遺書自闔開

坐來落葉兩三聲野菊開時雨滿城作客愁多仍歲晚
還家夢遠易天明古時豪傑有遺恨秋日溪山無俗情
君可歸歟吾未得百年懷抱向誰傾

次李宗烈見贈韻

秋風同是天涯客獨對黃花酒屢賒報主力微憐老驥
念親心在愧慈鴉故人漸少逢君晚新句能多對客誇
每見詩來歡喜極却愁吟罷轉思家

題清隱圖

清隱山人行地仙，尋雲獨往不知年。
鶴翻松子驚碁局，鷗蕩蘆花逐釣船。
題句霜乾拈落葉，煮茶月靜掬新泉。
塵中汗馬多如雨，一度看圖一惘然。

橫陽草堂次謝疊山韻

迤邐中州二水回，參差傑閣五雲開。
銀鈎透壁詩人去，鐵笛裂岩仙客來。
竹度蟬風涼白恰，松翻鶴露瀉清杯。
何時夜半梅花月，溪上吟篷帶雪推。

秋登九江廟晚眺

黃花開後葉初霜
紫蠟肥時酒滿缸
羈旅已知浮世淡
登臨未覺壯心降
天垂去鳥低平楚
水學驚蛇到大江
目極孤雲鄉思亂
烟波空想白鷗雙

題安可久山水之間卷

大隱淮南思小山
班荆樹下聽潺湲
林泉自古亦云好
魚鳥何時相與閑
龍出夏金滄海上
鶴馴喚鐵白雲間
是誰手種三花樹
獨往玄洲勘大還

嚴子陵釣臺

故人已乘赤龍去君獨羊裘釣月明魯國高名懸宇宙
澹家小吏待公卿天回御榻星辰動人去空臺山水清
我欲長竿數千尺坐來東海看潮生

夜泊獨柳次韻王尹子懋

霽月中天見絳河黃流滿地漾金波荒陂野火兼漁火
短棹吳歌雜楚歌去鴈已連家信杳閑鷗豈識客愁多
江南二月花如海獨負歸期奈爾何

雜一作和已作竟
閑作眠豈作未皆

誤

送僧遊杭

銅駝夜泣苔花冷，銀鴈秋飛寶氣消。
曾共殘僧披舊跡，尚憐故老話前朝。
衲隨猿掛雲生樹，杯趁鷗還月上潮。
師去新詩如見寄，白沙翠篠赤闌橋。

高郵

長陂雲氣滿淮東，下隱蛟龍萬仞宮。
潮岸樓臺連海上，水田杭稻似吳中。
古藤酒醒春風在，甌社珠寒夜月空。

四海昇平須進酒賣魚柳畔見南翁

南一作漁

次王伯純韻

并序

飲石室山房醉卧夜五鼓雞始鳴明星出未高伯
純秉燭攜詩來行簡孫君攤被起和之相視一笑
亦人間奇事也翠屏山人張以寧亦復倚和共一

笑云

草亭夜靜三人飲起視乾坤醉眼昏鶴警露光懸竹葉
烏啼月色滿柴門抽毫昔對蓬萊殿秉燭曾遊桃李園

天際形容今漸老尊前懷抱向誰論

題劉士行石林茅屋

瀟灑劉郎意絕竒
林西更好小堂基
石間青竹盡秋色
屋上白茅猶古姿
野雀巢簷羣就食
山精倚樹慣聽詩
東屯行處蒼苔滿
有客天涯獨夢思

次韻答茅壺山

乾坤納納知音少
歲月悠悠行路難
老我南山仍射虎
何人東海與持竿
風前薜荔秋衣薄
露下芙蓉古劍寒

金史四庫全書
卷二
欲借茅亭無限月，携詩滿意為君看。

題安仲華秀實卷

我有石田南澗澗，十年不歸秋草深。
羨君市隱少塵事，教子筆耕多古心。
夜露上花垂白玉，秋風吹穗卷黃金。
由來隴畝真足樂，何自細聽梁父吟。

題石生仲濂所藏李克孝竹木

息齋之孫李公子，盡將幽意入經營。
修篁石上生雲氣，古木山中作雨聲。
年來好畫不忍見，歲晏故園空復情。

烏巾掛在長松樹
吾欲巢居逃姓名

登閩關

獨步青雲最上梯
八閩如井眼中低
泉鳴萬鼓動哀壑
山飲雙虹垂遠溪
家近尚無鴻雁信
客愁復有鷓鴣啼
書生未老踈狂意
更欲崑崙散馬蹄

麋家店

廣陵

睡起秋懷入倚闌
蟪蛄啼雨豆花寒
途窮俗眼尋常白
宦拙臣心一寸丹
平子四愁詩最苦
休文多病帶頻寬

吾親已老身仍繫
寫就家書閣淚看

廣陵岳廟登瀛橋同成居竹賦

橋下波光綠染苔
橋前岳色翠成堆
鶴歸華表空中語
鰲負神洲海上來
瓊佩曉趨雲路響
琪花秋傍石闌開
唐家學士今何在
勸爾仙人酒一杯

常山縣

喜近閩山南去路
樓臺兩岸水迢迢
不知曉店三竿日
猶夢春江半夜潮
吏少縣庭常聞寂
戍還驛舍尚蕭條

平安寫就無人寄家在溪南第一橋

次同年李子威御史韻

呈康魯瞻公憲

日麗鈎陳薄霧消昇平有象見熙朝堯階雲擁千官仗
楚分星回兩使輶隼起青旻霜拂地鴻飛紫海月當霄
仙舟此日登瀛近春水花光已動搖

昔陪飛鞚杏園塵一落漳濱十見春懶問榮枯煩日者
祇憐寂寞向時人一驄獨顧蓬門靜雙鯉能傳藻句新
昨夜東風過淮水柳眉從此不須顰

題唐明府畫馮隱士像

能詩能畫唐明府置子清泉白石間秋色半林黃葉老
野心一片白雲閑王維自愛欵湖道李渤元居少室山
幾處溪山莫歸醉扁舟留在月中還

送葉景山掾史赴都

海上青山仙者家飄飄雜佩上飛霞牧之舊重淮南幕
博望今隨斗北槎黃道夜平星合壁紫臺秋冷雪成花
君行正及觀光便五色雲中望帝車

九日登蜀崗次王伯純韻

蜀崗崗頭秋滿天
醉舞黃花落酒船
一水白來飛鳥外
數峯青立遠帆前
梵王宮殿金銀合
帝子樓臺錦繡連
獨客登臨無限意
微紅塔杪夕陽懸

送崔士謙侍親還涿縣

剡中李白題詩處
我昔因之訪隱君
天姥樹低山似渚
曹娥潮上水如雲
懷人夜雪孤舟遠
送子秋風一鴈聞
捧檄高堂須一笑
白魚青笋漸紛紛

題遠遊卷

為君歌徹遠遊篇八極秋高神凜然禹穴出雲藜杖外
軒臺飛雪酒杯前昔人不見牛馬走世俗寧知龜鶴年
子去遥憐滄海上春來夢繞紫芝田

題臨川王與可拂雲亭

桐岡岡前讀書處虞公為賦拂雲詩鳳來明月星河近
龍起曾陰雷雨垂終見汗青傳琬琰時聞雜佩和墳簞
南歸定作亭中客蒼雪風吹落酒卮

送思齊賢調浙東掾

浙水東邊幕府開，扶桑朝景拖高臺。
熊旗虎節層霄下，龍戶緹人絕島來。
碧海清時稀警報，金天爽氣盛文材。
君行長笑金鰲頂，須有聲名徹上台。

次隨太守劉侯素軒韻

黃柳鶯啼驚早春，白沙羈客又淹旬。
喜逢鄴下劉公幹，曾識山陰賀季真。
漠漠林巒開雪色，欣欣草木荷天仁。
漢庭詞賦皆揚馬，薄技何因奏下塵。

送李遜學獻書北上

所藏父書

恭惟聖代開東觀詔選諸儒會石渠金匱已抽司馬史
牙籤猶藉鄴侯書獻芹耿耿心期在汗竹依依手澤餘
從此墨莊淮左盛漢庭卜式意何如

寄題琵琶亭

洲前亭子赤闌干白傅唐時此謫官渚花留客醉秋晚
江月向人啼夜闌溢浦波濤三峽外長安城闕五雲端
酒醒忽記東林路鐘磬蕭條暮雨寒

送姜知事湖廣掾

薇省恭聞吉語來，芙蓉幄下莫徘徊。
詩題郎署星辰動，檄到蠻溪霧雨開。
鄂渚暮濤喧鼓角，漢陽高樹出樓臺。
飛騰此日中天近，定有文章徹上台。

寄廣西參政劉允中

重臣授鉞殿南邦，五月旌旗過上江。
青帶碧簪環畫省，綠沉金鎖護油幢。
峒丁萬笠春畊野，海估千舩曉渡瀧。
銅柱南邊相憶處，尺書難寄鯉魚雙。

初度日次人韻

垂弧夙志負生朝
濫點鷄行從百僚
風雪十年雙鬢短
山川萬里一身遙
君如黃鵠方高舉
我匪蒼松愧後彫
已矣劬勞嗟莫報
願持貞白奉清朝

題采石娥眉亭

姮娥霜髮未摧頽
李白騎鯨更不回
異代登臨悲賦客
百年淪落憶雄才
淮雲白白鳥飛盡
山日蒼蒼猿嘯哀
欲起錦袍吹玉笛
為駈江浪入金盃

送劉素軒作守

使君持節西南去，漢水東邊十萬家。
每與儒生陳俎豆，閑隨野老問桑麻。
雙旌曉出千原雨，五馬春行幾縣花。
耆舊只今能有幾，一麾莫道遠京華。

送劉子昭歸杭省親

白魚青笋江南好，君去湖山知幾重。
潮長河舩四五尺，烏啼門巷兩三松。
笑予霜點秋來鬢，極目雲飛海上峯。
已把行藏付漁釣，尚煩書信到踈慵。

答張約中見問

衰遲久讓祖生鞭寂寞猶存鄭老氈
金馬隱來人豈識
木雞老去我方全坐移棠樹庭前日
夢到榴花洞裏天
多謝故人勞遠問濫竽博士又三年

字一作巾

儀真范氏義門

澆風久矣變淳源范氏猶稱古義門
四世於今千指盛
十年似爾幾家存棠華煜煜宜兄弟
竹笋攢攢長子孫
故里相從何日遂秋風江上戰塵昏

南窻竹影

錦闌花艷不勝春，翠袖輕寒寫更真。
湘浦雲中逢帝子，天壇月裏見仙人。
露痕稍稍疑將滴，風動差差覺未勻。
最喜高人王禮部，烏絲臨出越精神。

太平太傅致仕

明公先葉國元功，兩正台衡保始終。
喬木世家今絕少，黃花晚節古應同。
平泉草木風烟外，杜曲桑麻雨露中。
從此昇平歌帝力，為農祇願歲長豐。

次韻夜宿雙清亭

海子橋邊絲雨晴
水衡亭下穀波生
珠宮墜月醒龍夢
瓊島迴風送鶴聲
細數更籌憐夜永
遙瞻宸極願時清
左丞綵筆題詩好
紙貴明朝滿鳳城

元日早朝次馬彥韜學士韻

二首

雞竿紅日出晴霄
鷺序青春入早朝
治典新懸周象魏
頌聲盡入舜簫韶
稱觴冢宰容多喜
執玉藩侯禮不驕
今代總戎功業盛
承恩皆挿侍中貂

玉堂學士步青霄金榜英名重聖朝
身近清光依帝座手裁妙曲和仙韶
柳溝黃動鶯先喜麥苑青回雉漸驕
新歲時平詞館好客來呼酒費金貂

次李左司明舉看田朱家堡韻

願豐亭前春事深清時休日此幽尋
長思相覓飲君酒亦欲即歸投我簪
三月風光開卷盡百年交好契磁針
明晨擬看功成去赬蟻開尊蒲共斟

和周子英進講詩韻

宣文閣下仗初移講徹雞人報午時風細芸香飄紫殿
日高花影覆彤墀儒臣有戒陳忠蓋聖主無為寶儉慈
徽幕上賓工補袞垂紳早入鳳凰池

次韻春日見寄

金水河邊一遇君眼中天馬欲空羣姓名未接心先熟
笑語纔濃手遽分調古今難和白雪才高肯有附青雲
薰爐茗椀何時共細與論文到夕曛

和劉公藝暮春有感韻

醉夢還家醒未歸起尋墜萼惜流輝靜聞白蟻如牛鬪
閑看青虫化蝶飛日轉漸長添篆縷雨來忽冷覓羅衣
却思翠竹清溪路曛黑兒童候竹扉

恥向清時泣楚囚長尋佳句擬揚休碧雲千里隔春信
紅雨一簾生晚愁袖手獨應憐郢斲知心誰為和商謳
卜隣幸識劉公幹新得詩聲滿壁流

臘月夢還家侍親

喜著萊衣侍越吟覺來猶未脫朝簪五更霜月到家夢

十載風塵為客心
山遠梯歸啼更苦
海乾精衛恨猶深
幾時萬斛潺湲淚
盡洒墳前柏樹林

次韻感懷清明并自述

二首

雪落西樓虎滿村
鬢髭變白赤心存
徙薪肯信當時策
負米徒傷此日魂
啼老杜鵑山月苦
歸遲遼鶴海雲昏
早知只學東方朔
避世長依金馬門

翠屏峯前溪上村
萬家兵後幾人存
十年上冢阻歸興
五夜還家勞夢魂
燕蹴柳花風細細
烏啼松葉雨昏昏

何時步屨青蕪路月上山童候篔簹

桃源春曉圖

溪上桃花無數開花間春水綠於苔不因漁艇尋源入
爭識仙家避世來翠雨流雲連玉洞丹霞抱日護瑤臺
幔亭亦有虹橋約問我京華幾日回

題山水圖次張蛻翁韻

粵王山前雲出門疊嶂層峰萬馬屯龍過怒濤翻石壁
鴈迴飛雨暗江村泉頭洗藥流花片松上題詩濕蘚痕

長記釣船歸得晚潮平沙白月黃昏

題東坡淮口山圖

曾遊淮縣佩青綸飽看東南第一山煙雨十年詩夢外
風塵萬感畫圖間斜陽應照客愁滿去鳥尚如人意閑
遙想月明春樹綠蘇仙長化鶴飛還

追和楊仲弘饒州東湖四景詩上本齋王叅政
梅花吹暖透重闈紫馬朝遊湖上春嵐影盡兼雲影濕
漲痕猶帶雪痕新高人下榻來江表神女鳴璫過漢濱

為問棠陰今盛否君侯遺愛在番民

番君國裏水雲多雨歇黃梅漲碧波錦纜驚鷗穿弱柳
銀盤簇鱸裹新荷佳人狎坐傳觴令上客豪吟相棹歌
小范風流今有繼新詩樂石待重磨

使君曉命木蘭舟霽雨湖光碧玉秋樂妓並歌翻小海
詩仙同載上瀛洲萼香白露嘗初薦稻熟黃雲看早收
安得如公百元結狂瀾今為障東流

龍堂貝闕水仙家夜色清寒曉轉加淦淦凍雲低草樹

娟娟晴雪照梅花
舊盟漚鳥依輕槳
新釣鱖魚出古槎
玉署詞人傳好句
絕勝圖與鳳池誇

題雪窻墨蘭為湖廣都事李則文作

君家詩好錦袍仙
蘭雪清風故洒然
金地禪僧留妙墨
木天學士寫新篇
香來筆底吳雲動
思入琴邊楚月懸
聖代即今深雨露
流芳千載逮君傳

南宮校文次韻馬在新授經

二首

玉堂深鎖隔凡塵
夜合庭前月色春
剪燭焚香雲滿卷

開簾啜茗雪盈巾，慚無清鑒酬明主。
願重魏科得偉人，覓句喜陪王左轄。
老儒曾是幕中賓。

杏園飛鞚蹴芳塵，撫指而今四十春。
辛苦向曾携綵筆，衰遲重比岸烏巾。
丹成九轉雲籠鼎，燭盡三更月近人。
多謝能詩趙主事，自調大呂和麤賓。

送謝弘道福建理問

豫章人

江東謝掾舊風流，十載艱虞此壯遊。
節概紅塵雙短劍，功名滄海一歸舟。
粵王故國官梅早，楊子新墳宿草秋。

金少府人三
卷二
君去望鄉煩問訊可無高士重南州

送孔伯遜延平錄事

闕里諸孫聖代英作官去拜四先生雷霆入地溪聲合
星斗羅空劍氣明千載有傳文獻盛三年無事紀綱行
薰風荔子丹時後重待扶搖覲帝京

送鐵元剛檢歸三山

公子高昌世貴家佩懸明月弄飛霞仙方舊授壺公藥
使節新乘博望槎春幕日遲榕換葉晝庭風細荔吹花

烏臺消息明年近
驄馬金河踏軟沙

送趙文中南歸

憶飲黃山別酒時
穎濱汴上復京師
五千里外重來見
三十年中幾語離
碧海釣鰲君特達
紅塵騎馬我衰遲
過家遺老如相問
大隱金門舊小兒

環翠樓為危子繹作

樓在光澤縣缺牛關

新構清溪溪上山
天開罨畫翠迴環
欄橫星漢高寒外
坐入烟嵐晻靄間
衣桁暖生雲淅淅
琴床清滴雨斑斑

自安口居人言
卷二
癯儒夙有樓居好歸欲從之結大還

挽朱彥實母韓氏

畫錦韓家百載餘清風猶及渡江初
曾從夫貴膺金誥不待兒歸奉繡輿
墨暈帳昏秋閣冷錦文機斷夜窓虛
儲山好並瀧岡秀彤管他年更大書

次張祭酒虛游軒雨後即事韻并憶揚州舊遊
墻角紅葵一丈開鵝鳩聲斷雨聲來
雨鳴竹屋詩新就日度花磚夢恰迴
露蔓蝸行經午濕風枝蟬語近秋哀

虛游軒裏涼如水自玩春秋著玉杯

百年何處好懷開憶在揚州幾醉來落日放船穿柳過
微風歌帽看花迴即今盡減尊前興憶舊寧堪笛裏哀
一笑廣寒宮飯窄論文那得酒盈杯

次韻李明舉御史貢院詩

白晝春雷起劍池魚龍爭奮應新期銀袍照日光唐典
繡斧生風肅漢儀願得羣賢扶世治盡令四海轉春熙
昔年辛苦今衰白坐聽寒聲漏箭遲

次韻張祭酒新春詩

昕鼓聲遲日色暎
鷓袍如霧擁橋門
迎風栢葉翻雲影
過雨芹芽滴露痕
謾倚三年博士席
長懷百歲老人村
吾宗祭酒金鑾客
多謝新詩細與論

都城春日再次前韻

卿雲絢綵捧晴暎
春滿皇都十二門
苑樹嫩黃烟着色
宮溝微綠雪消痕
秧分過社新鉞水
麥種經秋秀被村
願見年豐人飽飯
廣文官冷底須論

送陳彥博編修歸省

成誼叔左丞館賓
左丞有積素齋

紫微老人積素翁有客毫端飛絳虹
長吟北征窺杜子
忽跨東海逐任公
高風祈水波浪白
初日搏桑天地紅
錦袍獨酌金鰲頂
笑睨一粟浮盃中

我家神山海上頭
昔交先公三十秋
幾年不歸父老憶
萬里復送郎君遊
白魚青筍上親壽
紫螿黃花銷客愁
明年老夫亦東耳
草堂小結並滄洲

次韻成均春日答潘述古博士

芳時雨露被恩榮
六館英遊五百生
揖退花邊分佩響
講餘松外度鐘鳴
風微高閣牙籤動
日靜深簾綠綺橫
多美材名潘騎省
題詩紙貴滿春城

祭酒江先生見和再次前韻

先生稽古如桓榮
老我憂時慚賈生
六鰲共掣碧海動
孤鳳先覩朝陽鳴
青春深院梧桐暗
紅日高盤苜蓿橫
誓將絲毫効補袞
長願磐石安維城

過郭州答子烜和韻

以後七言律皆係
庚辰年南歸作

擘破飛狐碧玉峯，奔河似電出盧龍。
晴波落日金明滅，遠樹寒烟翠疊重。
吟詩驥子新憐汝，返哺烏雛獨愧儂。
溪上故廬何日掃，故人携酒話竒曾。

同王趙二明府岸行裏河濱

御河行盡一千里，望入青齊樹際天。
野水飛鷗魚舍外，關山歸鴈客帆前。
日明野氣浮層浪，風動川光漾細煙。
客裏未能踈酒醞，春來聊復費詩篇。

過沛歌風亭

蒼梧帝逝薰絃絕千古三侯慷慨歌豐沛故鄉宜有感
韓彭猛士惜無多英雄老去臺空在魂魄來歸意若何
楚舞尊前鴻鵠起大風幾動漢山河

與趙德明談丁仲容作此寄之

江左詩人丁叟在淮南木落看青山尋僧野寺秋風去
送客溪船夜月還八口艱難新歎後廿年落魄醉吟間
城南郭泰能携酒得伴先生杖履閒

沽頭

日上河隄歸興濃
閘頭南望見遙峯
春城草木浮元氣
中土園廬尚古風
桑眼科餘黃蠹蠹
菜苗挑出綠茸茸
平生性癖耽幽靜
擬築團茅淮水東

徐州霸王廟

長洪聲動楚山虛
太息彭城霸國餘
父老更堪秦暴虐
英雄空為漢駟除
苔移玉帳蛛絲暗
柳繞黃樓鴈影踈
獨有春風虞氏草
魂歸為汝一沾裾

范增墓

為盜所發

鴻門已失秦天下千載彭城恨滿襟
亭長空驚撞白壁中郎還解摸黃金
乾坤不庇英雄骨霜露誰為怵惕心
獨有彷徨塵垢外穀城飛去白雲深

戲馬臺

項王築劉裕登

當時衣錦去關中天地移歸隆準公
空使秦人悲故舊更憐劉裕愧英雄
荒臺落日蜚鴻沒春草連雲戲馬空
太息重瞳千載少艤舟不肯過江東

燕子樓

楊柳青青汴水流
昔年歌舞侍君侯
城頭落日鴉聲起
樓上春風燕子愁
黃壤詎能留富貴
白雲無復夢溫柔
更憐山下虞姬草
煙雨年年恨未休

黃樓

蘇子徐州憂國疏
丹心百載尚依青山
昔日黃樓在
赤壁何年白鶴歸
西絕峨眉那復得
東還海道已相違
羽衣吹笛人何處
踈柳啼鴉自夕暉

呂梁洪

禹鑿猶存灑潁根
彼蒼設險壯彭門
山形奔過黃河怒
水氣陰來白日昏
賈客經營隨鴈集
舟人祭祀識龍尊
時平四瀆無波浪
笑指青帘買酒樽

邳州

輕帆飛度下邳城
兩岸青山鷁首迎
風約河聲歸海近
雲低樹色傍淮平
子房流落編書在
玄德驅馳髀肉生
欲弔古人無處問
飛蝗過後鴈哀鳴

吳門懷古

曾見吳王歌舞時遺臺廢苑不勝悲春風鴈唳菰蒲葉
夜月烏啼楊柳枝有客買舟尋范蠡無人穿塚近要離
館娃宮外繁花發游女長歌白紵詞

過吳江州

己巳歲過此孔世平州判今在廣東

三島堂下綠蘋風十載維舟兩鬢蓬范蠡無書留越絕
張翰有夢到吳中雲開笠澤浮珠闕月出長橋動綵虹
長憶故人心斷絕五羊南去少飛鴻

錢塘懷古

荷花桂子不勝悲
江介繁華異昔時
天目山來孤鳳歇
海門潮去六龍移
賈充誤世終無策
庾信哀時尚有詞
莫向中原誇絕景
西湖遺恨是西施

是一作似

富陽南泊驟風雨

征夫直北厭風埃
南下蒲帆北日開
山遠蒼龍趨海去
潮喧鐵馬蹴江來
雲昏白日林如失
風約青天雨却迴
短髮相欺予漸老
孤舟獨宿意難裁

烜次草萍壁間韻同作

浙東路入江東去酒醒籃輿幾處山
桑柘葉光朝雨濕棠梨花盡午風閑
青雲在昔同攀桂紫氣如今獨度關
只合溪頭垂釣去故人多在紫宸班

七里下舟至鉛山州旁羅店

懷玉山前似葉舟卧看帆影晚悠悠
雲飛梨嶺先南去水匯鄱江倒北流
烟堵白花迷晚蝶風林碧葉應啼鳩
去年此日隋堤柳馬首青青客正愁

過辛稼軒神道弔以詩

長嘯秋雲白日陰太行天黨氣蕭森英雄已盡中原淚
臣主元無北渡心年晚陰符仙蠹化夜寒雄劔老龍吟
青山萬折東流去春暮鷓啼宰樹林

題關上

黑崖削鐵立雲根絕頂東西石峙門兩戒山川分百粵
八州珠玉過中原層峯煖日迴羣鴈灌木高風嘯一猿
最爾海隅民力困漑肝誰為叩天閭

過武夷

羽節霓旌蔽紫氛，幔亭高宴武夷君。
虹橋一斷青冥隔，天樂多傳白晝聞。
岩掛玉機虛夜月，洞函金骨煖春雲。
紫陽見說今猶在，拜乞刀圭僕汝分。

至建陽文公宅里

河南夫子騎箕去，建水重生蓋世翁。
昔日中原知侍講，清朝四海學文公。
山藏劔履人如玉，壁出詩書氣若虹。
卜築何時隣此地，詠歸溪上舞雩風。

建寧府雨中登玉清觀

雙溪南下綠灣環碧瓦參差細雨間水繞玉清來九曲
雲歸滄海近三山鐵獅晝伏聞鐘鼓白鶴宵飛認佩環
欲結紫霞塵外想不堪回首近鄉關

宿大橋

橋畔人家水半扉題詩柱上十年歸青松落子風驚帽
紫棟吹花雨滿衣澗水遠隨楓樹去隴雲多傍笋輿飛
舉頭仰望長安日一箇啼猿響翠微

至瓜州

江流島嶼碧灣環兩岸樓臺掩靄間細雨春帆來楚峽
遙天曉樹見吳山嵐光去鷺半明滅雲氣與鷗相往還
欲訪鄉僧心已倦十年為客鬢毛斑

安南使者同時敏大夫登舟相訪獻詩述懷一
首就坐走筆次韻答之以紀一時盛事云

殿閣涼生雨霽秋紫皇宸御翠雲裘仗移日轉雙龍闕
詔下雲開五鳳樓英蕩熒煌頌授節羽旌雜遝擁鳴騶
詞臣垂老斯遊壯風送龍江萬里舟

再次韻答之是日微雨大風

五兩風高江上秋粵南使客木綿裘望雲舉酒思京闕
對雨裁詩倚樓燕語牆頭催去棹馬行果下待歸騶
到家為說天恩重早辦新春入貢舟

過小孤山

交趾江頭指壯遊小孤山下見新秋天鏡雙柱維南極
海作重門鎖上流使者星馳英蕩節神妃風送錦帆舟
來春二月停歸棹好薦芳馨杜若洲

廣州贈同時敏

明詔金門天上開，使人銅柱日南迴。
九江烟浪看廬阜，五嶺雲山過越臺。
嘉惠遠氓煩聖慮，宣風絕域伏竒材。
吾家博望風流在，絕喜乘槎比日來。

南昌行省迂至驛舍，同安南使宴於省廳參政
京口滕弘有詩次韻答之

緹騎傳呼出近郊，寵臨公館饋烝殽。
衰齡愧選光華使，盛禮欣逢道義交。
劔倚西風明左竹，旗開南霧導前茅。

春歸江右重相見欲結雲松此地巢

過南昌

平生未踏南昌土垂老經過駕使軺徐孺洲前花寂寂
滕王閣外草蕭蕭瑤臺月墮鸞聲杳鐵柱雲生蜃氣銷
獨喜西山青似舊昇平猶得見新朝

萬安邑令馮仲文家全椒與予舊識鮑仲華提
舉有瓜葛之好傾蓋情親戀戀有故人意君渡
江舊人有惠政得民心

萬安縣前小駐船
逢人盡說令君賢
風雲沛邑今幾載
冰雪魯山經五年
墨綬近民心樂易
綈袍贈我意纏綿
御屏風上書名姓
即見紫泥下日邊

舟中望贛州

虎頭城外水周遭
四望羣峯湧翠濤
帶雨布帆隨去鳥
牽江黃帽接飛猱
清秋度嶺君恩厚
永夜還家客夢勞
欲問交州何處是
五羊南去萬山高

贛州城下

番禺北下險秦嶺章貢西邊近楚郊五嶺氣來蒼霧合
雙溪聲動玉虹交山郵傍岸多攢石野屋緣城半覆茅
細雨舟中無一事新詩吟就手重抄

南雄卽事次牛士良韻

行盡梅關不見梅凌江南起畫屏開山連桂廣迢遙去
水合湏昌浩蕩來秋冷嶺雲收薄瘴時清溪雨應餘哀
吾家相國祠堂在明日臨風酌一盃

平圃驛中秋翫月用牛士良韻

平圃驛前端正月金鱗萬疊水光開
嬋娟幾見他鄉共
老大寧期此地來
星漢夜搖旗影動
江山秋入笛聲哀
病夫懶坐那禁酒
喜看頻傾舉玉盃

舜廟詩次韻牛士良

蒼梧落日百靈悲
韶石清風萬代思
洪水一從咨禹後
深山幾見避秦時
鳥耘歷歷傳遺跡
雞卜紛紛異俗祠
白髮舜弦峯下路
老儒獨詠卿雲詩

峽山寺僧慧愚溪邀觀壁間舊題因誦宋廖知縣

一律有云猿棄玉環歸後洞犀拖金鎖占前灣
予謂其切實類唐許渾賦以繼之

瘴嶺風煙勢漸開喜尋筇竹步莓苔江環列嶂天中起
峽圻流泉地底迴靈鷲飛來蒼磴老怪猿啼去白雲哀
軒轅帝子應猶在為奠南華茗一杯

廣州贈溫陵龔景清鄉人

家住三神海上峯秋風同聽禁城鐘離居自喜鄉音好
別去長悲客意重雙鯉水寒難遠寄五羊城晚忽相逢

來春此地重携手共采仙蒲花紫茸

封川縣次韻典簿牛士良

記取今年重九日封川水驛掛帆過秋風嶺外黃花少
暮雨尊前白髮多起接野僧談梵典卧聽溪子和蠻歌
少遊欸段成何事至竟男兒是伏波

梧州即景

蒼梧南去近天涯六士三陳昔此家水合牂江通漲海
山來桂嶺接長沙祥光夜認司空劔爽氣秋迎博望槎

擬欲朗吟亭上客春風歸看碧桃花

先生自註翺光乃漢趙佗埋叛之所

司空張華博望侯張騫皆吾家故事今借用之

烏岩灘馬伏波祠

烏岩江上古祠宮傳是征南矍鑠翁
丹荔黃蕉長盛祭綠沉金鎖尚英風
灘聲夜帶軍聲壯嵐氣秋隨劍氣空
莫羨少游鄉里好封侯廟食丈夫雄

次韻士良子毅登雷破岩劉大王廟唱酬

紙掛高枝濕暝烟乞靈多是往來船
雷轟古石猶遺跡

雨濕荒祠不記年，護羽翠禽低隱竹。
搖花白葦遠粘天，封侯萬里吾今老。
早辦扁舟別計然。

立冬舟中即事

一灘一灘復一灘，輕舟盪槳上曾湍。
三秋嶺外雨全少，十月邕南天未寒。
露岸葦花明白羽，風林橘子動金丸。
如何連夜還鄉夢，不怕關山行路難。

我家溪上白柴扉，久別兒時舊釣磯。
兵後故廬悲茂草，夢中慈母念單衣。
千年汗竹何多錯，萬里浮萍未暫歸。

佇立悲風揮血淚此身元不為輕肥

龍州答迎接官何符

帝念南邦遠貢琛
頒封特遣老臣臨
皇華諮度尊君命
炎徼淹留豈我心
日預占晴景好使
星還照瘴雲深
暫分莫洒臨歧淚
頭上青天見素襟

又答請命官阮士僑

使星南照破曾陰
咫尺天威儼若臨
銅柱迴看雙白鬢
觚稜仰望寸丹心
我留夢到雲霄迥
子去恩霑雨露深

到日鍾山頰一問清溪何日濯煩襟

又答

白髮飄蕭老翰林故鄉長憶越山陰
客程牛渚星槎遠吟思龍江烟浪深
多子出疆迎蕩節顧子為國抱葵心
行看洱水堤邊柳滿馬春風拂醉吟

次韻羅復仁編修

棹歌聲起洱河濱君著先鞭我後塵
山上安山猶遠使客中送客是愁人
心隨初日葵花轉眼看薰風荔子新

細數歸期同把酒龍江梅信定先春

情事未申視息宇內劬勞之旦哀痛倍深悲歌
以繼慟哭所謂情見乎辭云爾呈閻初陽天使

牛士良典簿

一身絕域已凄然三處離居更可憐中歲恨孤蓬矢志
暮齡忍誦蓼莪篇愁深鳶墜蠻溪外夢斷鶉啼宰樹邊

悔不阿奴長在側盡情家祭過年年

先生自註云老親未即土二寡婦携

孤兒在閩十口在金陵皆貧困一子與婦在松江與安南為四處何以堪此境也

予少年磊隗負氣誦稼軒辛先生鬱孤臺舊賦
菩薩蠻嘗慨然流涕歲庚辰過鉉山先生神道
前有詩云云見南歸紀行藁後會贛州黃教授
請賦鬱孤臺詩復作近體八句亡其舊藁因念
功名制於數定材傑例與時乖自昔不遇若先
生者蓋亦多矣然猶惜其未能知時審已恬於
靜退幾以斜陽烟柳之詞陷於種豆南山之禍
今二十九年矣舟過是臺細雨閉蓬靜坐忽憶

舊詩因錄於此見百念灰冷衰老甚矣云

鬱孤臺前雙玉虹一盃遙此酬英雄風雲有恨古人老
天地無情流水東精衛飛沉滄海上鷓鴣啼斷晚山中
清江不管人間事烟雨年年屬釣翁

安南即事

刺竹困頭過亂村白藤渡口出平原雲南嶺盡江光合
林邑潮通海氣暄綠舞稻苗風剪剪青肥梅子雨昏昏
炎方風物新春異吟罷長歌擊酒尊

洪武二年三年
所作律詩止此

七言律詩拗體

次韻安慶汪仲暹超然亭

超然之亭舒水上絕景迺得天公偏石柱秋開金菡萏
星河夜落玉觥船獨騎麒麟上倒景下視蟻蠓空飛烟
舞雩人去忽千古令我望之心惘然

送李叔成遊茅山

山頭丹光湧日紅不盡幡幢來碧空李白獨騎一赤鯁
茅君導此雙青童織雲上衣擲葉雨墜雪撲帽松花風

仙入笑指海水落相約蓬萊之上宮

竹軒

門外紅塵一丈深開門碧霧秋陰陰十年對雪守漢節
三月不肉聞韶音風高常與鶴同夢雨作或聽龍一吟
淮南大隱人所羨令我不樂思故林

平野

北來羣山亦已無曠望元氣春糝糊雲低不斷滄海去
樹遠欲盡青天俱何人胃吞九雲夢尚恨水有三蓬壺

巨靈不為鑿，疊嶂長使詩人心鬱紆。

雪石

峨眉之西古時雪，削玉娟娟嵌太空。山川只今留夜月，
草木為爾回春風。閉門洛下謝過客，授簡梁園米老翁。
梅花滿樹百壺酒，我欲枕石於其中。

泊龜山

詩中之景指洪澤屯也

白波滉漾青天垂，我行但覺官船遲。微微樹短水盡處，
慘慘日薄風來時。椎牛掛席打鹽客，射鴨鳴弓蹈浪兒。

漫郎頭白不稱意沽酒龜山歌竹枝

自挽

按先生生於元辛丑終於安南洪武三年五月四日也臨終自作此詩是日而逝蓋

享年七

十矣

一世窮愁老翰林南歸旅櫬越山岑覆身粗有黔婁被
垂索都無陸賈金稚子啼饑憂未艾慈親藁葬痛尤深
經過相識如相問莫忘徐君掛劍心

五月十三夜夢侍讀先生枕上成詩

牛諒

翰林

典簿

出使艱虞萬里同歸期日日待秋風寧知永訣蠻江
上才得相逢客夢中岸幘尚看頭似雪掀髯猶覺氣
如虹起來杖淚憑欄久落月啼螿遶殯宮

七言長律

濟南寓公程鵬翼耀彩亭

濟南山水似江南耀彩亭前綠滿潭萬柄高荷風娜娜
兩行弱柳露氤氳絳綃仙子籠新浴翠蓋佳人倚半酣
色靜每於心獨契香清長許鼻先參剪筒瀉酒留人醉

採酌分茶與客談風景不殊時事異即令看畫意何堪
分韻得覃字送中丞張叔靜之西臺

西臺執法雪盈簪奉詔之官駕兩驂玉節秋霜飛渭北
錦衣晝日照終南道迎背襁遺民集庭列腰刀大將參
花外小車行處好崇邊芟舍種來甘清時有象今重見
聖澤無私正遠覃莫憶山中黃石約五雲天上近台三
送林崇高廣西都事

清江材子請長纓風雨南荆萬里行組甲夜馳豺虎窟

帛書朝奏鳳凰城公車已見登臣樂幕府旋聞用子荆
照海錦帆津吏報轟山銅鼓峒人迎檄來篁竹霜都靜
詩到梅花雪共清上日桂林延父老為言折木秦堦平

中書右司提控秋霽軒

西山收雨紫嵯峩爽氣如秋右掖多省樹靜移雲影度
官簾徐轉日華過粉闥寓宿青綾被黃閣朝隨白玉珂
團靜雞竿稀布令邊清虎革漸包戈盛時三語俱材掾
休日相從足雅歌紅藥紫薇春信近更吹新律作陽和

五言絕句

泊十八里塘

繫舟古柳根一犬吠柴門欲記詩成夜問人何處村

詩成

一作

來時

渡江

幾載途中月窺愁酒半酣送人楊柳色今日是江南

題道士青山白雲圖

仙館白雲封青山第幾重道人時化鶴巢向最高松

長愛青山好行行入翠微
今朝山頂上下看白雲飛
行到溪源盡青山無俗氛
道人拈鐵笛吹起滿川雲
只道溪源盡遙聞鐘磬音
却尋流水去行盡白雲深
雲氣曉來濃前山失數峯
道人夜作雨呼起碧潭龍
林秋紅樹出溪曉白雲多
此景江南有江南今若何

賀李孟幽中丞壽四絕

十日書雲後窻中影漸長
好將五色錦為補舜衣裳
春信到琴邊聲成意已傳
須裁太古曲天上和虞絃

清曉寫詩成飛英點玉觥為傳梅信好聞早入調羹
暖到牙籤早芸香已報春鳳毛新可喜臨得晉書真

次張仲舉祭酒詠花

槐花

黃露結青枝風吹散秋雪憶昨馬蹄忙壯年心未徹

葵花

日出赤城霞瑤臺宴萬花酒闌朝絳節整整復斜斜

水紅花

穗長仍葉密紅粟綴枝鮮種秫今年熟相將買酒舩

木槿花

朝昏看開落一笑小窻中別種蟠桃子千年一度紅

玉簪花

月女烏雲滑瑤笄墜許長花神藏不得清露一簾香

和拜明善韻

并序

翰林都事喀喇拜君文善以貴介之胄嗜學攻詩
與寒士角其能歲嘉平月十八日文善携二詩過

子明時里之寓軒時雪新霽微月在空誦詩再三
過命酒四五行儵然覺人世塵土俱空因念天壤
間清致喜不可多遇昔人有月夜泛渚雪夜訪戴
者不知視今茲為何如也遂次韻為四首備他日

佳話云

聽雪裁詩就詩將雪共清不緣心境淨那解聽無聲
雪裏趺然至人間無此清瑤田今夜鶴下聽誦詩聲
憶踏江南雪看梅領好春酒醒燕月白惆悵未歸人

竹樹庭前雪松花
窺面春徘徊今夜月應是為詩人

太和縣

曉掛船窻看蒼茫
暝色分前山知有雨
流出滿江雲

揚州廣城店

潮落邗江夜先將夢到家
揚州無賴月獨自照瓊花

七言絕句

題月落潮生圖

參橫天末樹陰收
風響蘆根海氣浮
笑語漸聞燈漸近

誰家江上早歸舟

雨中縱筆書悶

飄零不奈木腸何
錦字淒涼鴈字過
猶有思親千點淚
秋來較似雨痕多

題顧善道山水

洲前老樹似人立
岩際顏雲如水流
夢著滄江歸未得
醉來渾欲上扁舟

題崔元初醉翁圖

春雲石上蒼苔冷芭蕉風動綸巾影仙翁醉著人自扶
花落花開幾時醒

題小景

雀啣江頭秋稻花顛風吹柳一行斜漁舟細雨獨歸去
白石滄江何處家

同徐元徵錢德元酒邊即席題壁間山水

白雲垂柳露穆穆聽徹金雞月滿潭千里汴堤塵拍面
夢從淮左過江南

題桃花圖

溪上桃花春可憐
赤欄橋畔憶遊仙
若為飽喫胡麻飯
看到三千結實年

書所見

浦外青山浪作堆
淡雲將雨送秋來
停舟荻岸西風裏
閑愛野花無數開

題扇

陰陰古木精靈語
慘慘長風蜃鱗驕
有客扁舟秋睡起

笑看滄海月明潮

衢州詠爛柯山效宋體

二首

人說仙家日月遲
仙家日月轉堪悲
誰將百歲人間樂
只換山中一局碁

洞裏仙人笑客癡
斧柯爛却忘歸時
人間宇宙無窮事
只似山中一局碁

憶六合

江北淮南三月時
水烟漠漠柳絲絲
好花一夜霜都落

却是春風總未知

題畫猫

綉茵睡起飽溪鮮
半卧閑庭日靜前
憶在牡丹花下見
雙睛一線午晴天

題畫白頭公

二首

日暖花開海上洲
飛來青鳥話閑愁
三生莫為多情煞
惹得春風白了頭

蜀魄啼時清血流
斷雲荒樹不堪愁
山禽不管人間事

也向春風自白頭

題錢唐春遊卷

銀鞍白馬少年遊
十里朱簾上玉鈎
為問別來新柳色
春風得似舊杭州

戲作杭州歌

二首

吳姬鮎冠望若空
淚粧眼角暈嬌紅
染得羅裙好顏色
西湖新柳綠春風

西陵渡口潮水平
十五五發舟行樓
中燕子慣見客

不怕渡頭津鼓聲

存恕堂卷

存恕堂前種杏家
絳光夜夜發丹砂
別來為問揚州月
開到春風幾度花

浙江亭沙漲十里

重到錢唐異昔時
潮頭東擊遠洲移
人間莫住三千歲
滄海桑田幾許悲

灤陽道中次韻李伯貞中丞李孟幽參政

二首

共騎官馬取長途為愛佳山每緩驅
剪剪水風牽草帶
踈踈沙雨長松鬚

杏園飛鞚忝同途天驥羸驂不並驅
曉起灤陽成獨笑
燕霜渾白少年鬚

王叔周山水圖

重重疊疊水南峯五五三三石上松
釣艇恰歸春雨至
草亭猶是白雲封

浙江潮圖

浙江亭下彩舟開雪滿青天白晝雷聞說祇今亭上月
夜寒長照暗潮來

雲岩詩為傅元剛題

千岩翠色曉紛紛遠樹微茫路不分應是林端飛瀑布
春風吹作滿川雲

劉元初桂花圖

醉上淮山喚八公白鸞騎到廣寒宮滿身香露銖衣濕
十二瑤臺月正中

二馬圖

草軟沙平日暖天相摩相倚最相憐無端走上長楸道
噴玉爭先掣電邊

錢舜舉畫

紫茄

江南坝裏紫彭亨粟致錢郎巧寫生憶得故園秋雨過
新炊初熟飯香粳

絲瓜

金匱要略卷二
卷二
黃花翠蔓子纍纍寫得西風雨一籬愁絕客懷渾怕見
老來萬縷足秋思

次翰林都事拜珠春日見寄韻

日高睡起小窻明飛絮遊絲弄晝晴忽憶金河年少夢
柳陰騎馬聽流鶯

墨蘭為湛然上人題

雲林蒼蒼石齒齒一花兩花幽薄底遠香自到定中來
道人湛然心不起

和同年馬仲臯詠文韻

四首

斯文萬古日當中
僭續遺經恐未公
辛苦河汾亭上叟
將琴直欲和南風

妖香冶艷底須誇
絕好姚黃魏紫家
一種天然清水上
愛花須讓愛蓮花

風月庭前草色春
魯東門後一儒真
圖書古奧遺經似
愧殺辛勤倒學人

聽着啼鶻早慘神
談經那復昔儒醇
黃茅白葦秋風急

曾與夷門起戰塵

題北山蘭蕙同芳圖

秋露春風各自妍
幽香併到雨華前
道人不是騷愁客
慣讀南華第二篇

題雪窻蘭蕙同芳圖

春來騷意滿江干
轉蕙風光更泛蘭
睡起老禪閑一笑
月明香雪竹窻寒

題李文則畫

陸羽烹茶

閱罷茶經坐石苔
惠山新汲入瓷杯
高人慣識人間味
笑看江心取水來

蘇公赤壁

赤壁江寒葉漸稀
黃泥坂靜露斜飛
洞簫聲裏當時月
應照十年化鶴歸

淵明送酒

五柳門前秋葉衰
南山佳氣滿東籬
白衣人到黃花外

正是先生述酒時

逸少蘭亭

蘭亭佳處憶曾過已較前人感慨多
修竹茂林今在否
畫中一看意如何

題邊魯生墨竹為汪大雅

白沙舊遊邊魯生鳳城今識汪大雅
忽見此君如故人
滿室清風共瀟洒

題畫

棠梨幽鳥

揚州舊夢隔天涯
曾醉春風阿那家
幽鳥豈知人事恨
依然啼殺野棠花

梨花錦鳩

一枝新雨帶啼鳩
喚起春寒枝上頭
說與朝來啼太苦
洗粧纔了不禁愁

次韻廉公亮承旨夏日即事

六首

金杯綠酒薦菖陽
玉手輕調雪盃涼
猶憶舊家重午宴

釵頭符綴鳳雙翔

葵花向日獻紅芳
不見隨風柳絮狂
睡起竹窻清似水

胡床獨坐午陰涼

柴門細雨曉慵開
綠樹陰籠一徑苔
老子眼花今日較
起尋枸杞點茶盃

盡情好鳥隔窻呼
墻角新苔上酒壺
却羨承平無箇事
看花酌酎老堯夫

文章閣老舊名門
玉署清閑醒夢魂
應憶蘆園花似海

朝回會客酒千尊

翠屏山水清冷茅屋荒苔綠滿庭不是不歸歸未得
移文誰與謝山靈

夜過陵州

河堤月上水迢迢卧聽陵州夜渡橋腸斷江南二三月
落花蝴蝶上蘭橈

東昌

暖日初抽宿麥芽東風吹草綠平沙江南開老春多少

二月東昌見杏花

梁山灤

風正吳檣去不牽
雪融汶水綠堪憐
菰蒲渺渺官為市
楊柳青青客上船

泊沽頭

楚客歸心河水流
三更月暈長年愁
沙河雨漲催開閘
半夜櫓聲無數舟

邵伯鎮

廣陵此去無多地煙柳堤邊一萬家
已有小舟賣新藕
便思携酒看瓊花

揚州

誤喜維揚是故鄉故鄉南去越山長
越山三月花如海
倚門應說到維揚

過觀州悼阿仲深狀元

麒麟墮地天不惜流落荒郊魯叟悲
白髮杜陵憂國淚
臨風獨詠八哀詩

聞同年劉子實盧可及訃

江湖菰蔣岸莓苔
矰弋如雲鴻鴈哀
麟鳳半歸天上去
玉京羣帝獨憐才

道中

花飛芳樹碧毵毵
已過西湖三月三
草草青帘人買酒
常州北畔似淮南

子烜買紅酒

吳江紅酒紅如霞
憶着故園桃正花
羊角山前幾迴醉

女嬃嗔汝未還家

嘉興有感陸宣公事

官家忘却奉天時
歲晚忠州兩鬢絲
今日北來車馬客
夕陽祠下讀殘碑

夜泊雲浦

雲浦四更潮已平
蕩舟月落唱歌聲
山中應是夜來雨
流出落花春水生

過桐廬

江邊三月草淒淒綠樹蒼煙望欲迷
細雨孤帆春睡起
青山兩岸畫眉啼

宿新站

銀漢迢迢白露盈錦屏咫尺隔深情
溪風夜冷鴛鴦起
獨自推篷看月生

玉山縣店見壁間黃山林獻可詩次韻

淮水風高鴈影微澄江潮細鯉魚稀
客愁正怯江東雨
花落青林聞柝歸

宿南嶺書

二首

綠竹月明客夜行
青山雨過人春耕
閩中富庶天下少
千里山川東錦城

今朝初聽鄉人語
八載淮南此日迴
江東白酒不醉客
為渠歡喜盡殘盃

過崇安宿赤石水澁不下舟

兩岸青山下建溪
筓輿軋軋坐雞棲
人間最是吳兒樂
一枕清風過浙西

科舉以滯選法報罷士無有為錢若水者何也
予於膠西張起原坐上聞此語悚然予獲庚甲
戌冬而乙亥科舉罷徒抱耿耿進退跋躓比古
昔有志之士所以仰天淚盡者也感胡永文事
賦廿八字凡我同志當為憮然

竹實離離紫海春高飛鸞鳳出風塵哀鴻不作青冥想
空向江湖怨弋人

到建寧贈星者蘇金臺

庚辰年所作止此

博望乘槎斗牛去蜀莊簾下獨沉冥金臺五緯光聯壁
何處江湖有客星

南京早發

大隱金門三十載壯懷中夜每聞雞今朝一吐虹霓氣

萬里交州入馬蹄

先生自註云蘇老泉云丈夫不得
為將得為使折衝萬里外足矣

晚泊石頭城下明日發龍江

江口帆開五兩飛海門遙望樹依微若為得似千年鶴

東向三神島上歸

過大聖港新河口

佳氣龍蔥紫翠間人家百萬繞鍾山
新河亦似知形勢流入龍江第一關

蕪湖

忠臣解體將離心一鼓蕪湖九鼎沉
遺老尚談前宋事惜無人解說王琳

泊月子河望三山

三山仙島隔歸期長夜京華夢見之
明發開帆成誤喜

青天三點見峨眉

焦磯廟

碧殿紅櫺翠浪間
江風縹渺動烟鬟
神雞不逐雲中去
啼殺清秋月滿山

過采石

重過峨眉訪舊遊
三山無恙水東流
若為喚起青蓮客
共醉西風亭上秋

天塹西邊牛渚磯
燃犀誰敢照朱衣
而今盪槩平如掌

薄暮漁童買酒歸

月子河阻風

洱江萬里此朝東
入貢舟航四海同
明代百神都受職
為言休作石尤風

有感

馬首桓州又懿州
朔風秋冷黑貂裘
可憐吹得頭如雪
更上安南萬里舟

為舟人萬氏題象圖

雪白雙牙雲滿身日南萬里貢來馴
遠方奇物真堪畫
却是中州有鳳麟

舟中望廬山

重過廬山三十秋西風催送上湖舟
若為借得仙人鶴
飛到香爐峯頂頭

老無傑句對廬山紫翠遙看霄漢間
羨殺倒騎牛背客
買田長占落星灣

過臨江望閻皂山

金史紀事本末卷二
閻皂山青瑣夕霏仙翁舊館尚依稀歸來倘似遼東鶴
愁殺十年老令威

懷故人鄧南臯

夕陽獨立楚江邊不見南臯二十年欲寄平安無處問
津頭風急起官船

遇故人胡居敬臨江府送至新淦

共酌簷花細雨前淒然重見此江邊停舟莫怪難為別
能幾人生二十年

翠竹蒼松映白沙清江西畔是君家明年歸路重相問
分食東陵五色瓜

蚤逐浮榮老未歸便歸生事已全非人生只合藏名姓
白首青山一布衣

過臨江

懷劉原文孔文仲諸賢

江右流芳墨作莊氣雄文古壓歐王平生却為多稽古
憂殺平南狄武襄

二賢江右起聯翩洙泗支流迥有傳聞說九京英爽在

臺章深悔到伊川

吉水縣違新淦二十里濱江一帶皆丹山無草

木因憶予鄉云

文江佳處似吾家碧水丹山映白沙誤喜霞洲歸路近
不知南去尚天涯

安南使令上頭翰林校書阮法獻詩四絕次韻
答之

封王賜印出天家授青臨軒遣使華遙想南交迎詔日

望雲羣拜六龍車

窮髮雕題已一家日南使者覲京華君王親校燕山籍
駕出金根白象車

騎馬成行醉插花天恩賜宴賞枋華知君無限傾葵意
長向南邊望日車

十行天詔出江關百尺雲帆下碧灣慚愧風姨聽帝令
霎時天外過三山

銅柱南邊石作闕海門鎮外碧成灣喜君心似朝宗水

直過千重萬疊山

小孤廟下海門關五老峯前星子灣多君萬里斯遊壯
看到東南第一山

來時西蜀三韓使奉表遙同馬若飛歸到安南應說與
皇恩天覆萬方歸

四十餘年金榜客玉堂人詫筆如飛君王親重儒臣選
肯受南方一物歸

十月南方暑氣微洱河驛外葉初飛遙知夾岸人爭看

入貢中朝使者歸

秋風吹海送仙槎
夜色新涼曉轉加
歸日阮郎應一笑
小春洞裏又桃花

安子山前使者家
枕榔椰葉翠交加
知君來歲重修貢
飽看皇都二月花

乘軺萬里已忘家
客思逢秋陡倍加
大庾嶺邊東去近
惜無驛使寄梅花

子已丑夏辭家客燕二十年
江南風景往往盡

中見之戊申冬來南京今年六月二十九日奉
旨使安南長途秋熱年衰神憊氣鬱不舒舟抵
太和舟中睡起烟雨空濛秋意滿江宛然畫中
所見埃壒為之一空漫成二絕以志之時已酉
七月二十四日也

風飄萬點濕秋雲萬葉涼聲睡起聞翻憶東華衣上汗
向人揮作雨紛紛

家住翠屏溪上頭思尊空結半生愁今朝初洗紅塵夢

烟雨西江滿意秋

舟中觀物憶亡兒烜

誤我虛名已白頭
可憐望汝紹箕裘
烏牛舐犢斜陽裏
忽見潛然老淚流

海內名人儘望渠
豈知意廣却才踈
老來只願兒癡鈍
解種先疇讀父書

別時叮囑忍能忘
憶着潺湲淚萬行
復恐老年悲太甚
痛來無奈罵踈狂

草深北嶺暗寒烟白骨無人瘞九泉留得虛名詩滿篋
可憐亂後落誰邊

二十七日晚到萬安縣縣令馮仲文來問勞翌
日登岸觀故宋賈相秋壑所居故址左城隍祠
右社稷壇中為龍溪書院其後二喬木鬱然云
賈相生於此書院舊甚盛田多於邑學今歸之
官獨舊屋前後二間中存先聖燕居像左四公
木主徘徊久之當宋季年君臣將相皆非氣運

方興者敵襄樊無策可救江左人材恥然無可
為者譬之奕者不勝其偶無局不敗是時有識
者為崔菊坡葉西麓無已則為文山李肯齋可
也而癡頑已甚貪冒富貴國亡家喪為千載罵
笑而刻舟求劍者乃區區議其瑣瑣之陳迹悲
夫因賦二絕如罪其鞫留信使之類皆欲加之
罪之辭也

木綿庵畔瘴雲愁猶戀湖山一壑秋從道黃梁俱一夢

幾人解上五湖舟

顏垣葛嶺草烟中富貴薰天一霎空惟有西江精舍舊
至今猶是素王宮

夜聞雨

田家望雨今年少水驛逢秋夜半聞更喜朝來晴未穩
山頭着帽盡生雲

南康驛丞王珪文玉嘗逮事故郎中顏希古求

詩為走筆書一絕

芙蓉江上曉維舟
雨洗波光碧玉秋
來歲維舟應憶汝
春風杜若滿芳洲

晚到韶州

雲斷蒼梧隔九嶷
九成臺畔草離離
山中不是無韶石
千載何由起后夔

帝舜廟

姚江禹穴會稽東
少日登臨一夢中
白髮南來身萬里
欲登韶石和薰風

張文獻祠

兒時長誦八哀詩遺誥相傳自昔時
空料白頭祠下拜
曲江烟雨讀唐碑

余襄公祠

名在東京四諫官曲江日照寸心丹
只今遺廟年年祭
可是功名久遠看

發廣州

照海紅旗送使舟鳴笳伐鼓過炎州
斯遊少吐平生氣

巨浪長風萬里秋

題畫馬

滿身雲濕出滇河九折羊腸抹電過天廡飛龍今百萬
儘渠飽卧夕陽坡

代簡周幹臣廣東叅政

二首

馬人龍戶集衙時篁竹風清化日遲海角亭中官事了
畫簾小草寫新詩

眼昏頭白尚天涯戀闕心勞不憶家何日五羊江上驛

一尊同對刺桐花

卷二

代簡楊希武右丞安南驛書懷

二首

荔枝花發雨蕭蕭
睡起春江又早潮
長憶午門紅日上
聖恩寬許紫宸朝

花滿皇州春尚寒
天香縹緲五雲端
遙應夜夜觚稜月
照見臣心一寸丹

廣東省郎觀子毅翩翩佳公子也讀書能詩甚
閑於禮以省命輔子安南之行雅相敬禮子暫

留龍江君與士良典簿先造其國正辭嚴色大
張吾軍今子毅北轍而予南轅家貧旅久復送
將歸深有不釋然者口占絕句四首以贈詩不
暇工情見乎辭云爾

江頭一別兩躊躇半載相從千里餘君向番禺我交趾
若為頻寄幾封書

東原典簿好斯文能賦能言更有君白髮老夫猶絕域
羨君歸去上青雲

道傍逐騎走續紛旗旆飛揚鼓角聞到處聚觀天使貴
老儒何以報吾君

閩山灌木翳先廬七十炎荒更久居君倘朝京煩一問
老妻弱子近何如

予以使事留滯安南安南人費安朗以隱宮給
事其國親貴近臣家老而彌謹預於館人之役
朝夕奉事甚勤拜求作詩懇至再四口占二絕
予之一以志予念鄉之感一以對景自釋焉

抱珥江邊春水流
遠從東海過吾州
若為寄得雙魚去
直到玉灘溪上頭

拍拍鳧鷖睡滿河
鯉魚翻子跳晴波
怪來天上乘槎客

將到春風有許多

先生自註云昔蘇長公云齊魯大臣史失其名而黃四娘乃以杜子美詩

傳於世不知子詩之果傳乎否也漫書以為一笑

代簡廣西叅政劉允中

五嶺宜人獨桂林
梅花雪片一冬深
遙知華省文書暇

飽看奇峯碧玉簪

蛋雨蠻烟嶺外州
乘槎何事此淹留
龍江風土差高爽
衰老天教一壯遊

論詩

富貴辭夸奈俗何
清虛趣勝亦詩魔
白雲瑤草紅塵外
終勝黃鶯綠柳多

詞

江神子送醫官石仲銘攝邵伯鎮巡檢得代

謝公埭上綠成圍
棟花飛子規啼
簇簇弓刀白馬擁
驕

嘶一樹棠梨開透也春正好又分携
草萋萋望中迷
衣錦歸歟家在海雲西種杏明年功又滿還捧詔上金

閏

廣州市治南漢主劉鋹故宮鐵鑄四柱猶存周
覽嘆息之餘夜泊三江口夢中作一詞覺而忘
之但記二句云千古興亡多少恨摠付潮回去
因彙括為明月生南浦一闋云

海角亭前秋草路榕葉風清吹散蠻烟霧一笑英雄曾

割據癡兒却被潘郎誤
寶氣銷沉無覓處
蘇暈猶殘
鐵鑄遺宮柱
千古興亡知幾度
海門依舊潮來去

先師張先生三山之古田人
幼而聰慧長而博學
未壯登李黼榜進士第
與其同年黃子肅江學
庭諸老俱有聲當代
而先生之名尤著
宦途中
阨留滯江淮
光霽獲從之遊
昕夕聆誨為益不少
素欲壽其遺藁以報
萬一近罹多故散逸罕存
僅得其雜詩百篇
姑鈔諸藁餘俟求之次

第刊行非止是而已也時洪武庚午二月初吉
國子監博士淮南石光霽再拜謹書



翠屏集卷二